

**Uunga siunnersuut: Nunaoil A/S pillugu Inatsisartut inatsisaata allanngortinneqarneranik inatsisartut inatsisaat nr. xx, xx 2017-imeersup**

(Aatsitassanut Ikummatissanullu Naalakkersuisoq)

**Saqqummiussissut**

(Aatsitassanut Ikummatissanullu Naalakkersuisoq)

**Siullermeerineq**

Naalakkersuisut sinnerlugit matumuuna Nunaoil A/S pillugu Inatsisartut inatsisaata allanngortinneqarnissaanut siunnersuut saqqummiuppara.

Ikummatissiassanut suliassaqaarfimmi ingerlataqarnerit nunarsuaq tamakkerlugu annikilliarput. Tamanna aamma Kalaallit Nunaanni malugisimaneqarpoq. Nunaoil A/S-imi ataatsimeersuarnermi ingerlatseqatigiiffiup suliaqarnerata aammalu siulersuisut katititaanerisa, ikummatissiassanut suliassaqaarfimmi niuerfimmi ineriartorerup nikerarnera ilutigalugu naleqqussarnissaannut eqaatsuutitsinissaq siunnersuummi qulakkeerreqarpoq.

Siunnersuummi Nunaoil A/S pillugu Inatsisartut inatsisaanni pingasunik iluarsiiisoqarpoq.

Siullertut siunertamut aalajangersagaq iluarsineqarpoq, taamaalilluni oqaasertaliineq ”Kalaallit Nunaanni avataanilu” peerneqarluni. Allanngortitsinermut tassunga siunertaavoq, nunani allani suliassanik isumaginninneq Nunaoil A/S-imut imminermini siunertaannginnerata erseqqissarneqarnissaa. Kisiannili imaalissasoq Nunaoil A/S-ip ataatsimeersuarnermini suliassat suut isumagisarissanerai aammalu suliassat nunani allani imaluunniit Kalaallit Nunaanni isumagineqassanersut ingerlatseqatigiiffiup oqartussaasuisa qullersaanni aalajangerneqartalissasut.

Aappaattut siulersuisuni ilaasortat amerlassusaat taakkualu piffissaq toqqagaaffiat iluarsineqarput. Inatsisartut inatsisaat maannakkut atuuttoq malillugu siulersuisunut ilaasortat tallimat toqqarneqartussaapput, taakkunanga ataaseq naalagaaffimmit toqqarneqartussaalluni. Inatsisartut inatsisaat maannakkut atuuttoq malillugu piffissaq toqqaaffiusartuq ukiunik marlunnik sivissuseqarpoq. Ingerlatseqatigiiffinnut inatsisit nalinginnaasut malillugit aktiaatileqatigiiffik minnerpaamik pingasunik siulersuisunut ilaasortaqartussaavoq. Siunnersuut malillugu Nunaoil A/S-imi siulersuisunut ilaasortat amerlassusissaannut piumasaqaatit minnerpaaffeqassapput, taamaalilluni ingerlatseqatigiiffinnut inatsisini nalinginnaasuni piumasaqaatit minnerpaaffissaannut naapertuulluni. Siunnersuummi naalagaaffiup siulersuisunut ilaasortamik ataatsimik toqqaanissamut pisinnaatitaanera ingerlatiinneqarpoq. Siunnersuut malillugu ukiunut marlunnut toqqaasarneq atorunnaarpoq.

Pingajuattut siulersuisunut ilaasortat piukkunnassuseqarnerannut piumasaqaatit iluarsineqarput. Siunnersuut malillugu siulersuisunut ilaasortat inatsisinut, aningaasaqarnermut inuussutissarsiornermullu tunngasut pillugit uppersarneqartunik qaffasissumik sulianut ilisimasaqarnissaat pillugu piumasaqaateqartarneq ingerlaannassaaq. Taamaattoq siunnersuut malillugu siulersuisunut ilaasortat ikummatissiassanik misissuineranut qalluinerimullu tunngatillugu pissutsit pillugit immikkut ilisimasaqarnissaat piumasaqaataajunnaassaaq.

Inatsisartut inatsisaat maannakut atuuttoq malillugu pisortap piukkunnassuseqarnera ilinniagaqarsimanikkut qaffasissuussaaq minnerpaamillu siulersuisut ilinniagaqarsimassusaannut naapertuutissalluni. siulersuisunut tunngatillugu ikummatissiassanik misissuinermut qalluinernullu tunngatillugu immikkut ilisimasaqarnissaq pillugu piumasaqaat atorunnaarmat piumasaqaat taanna pisortamut tunngatillugu aamma atorunnaarpoq.

Naggataatigut inatsisissatut siunnersuut nassuiaatillu tassunga atasut innersuussutigissavakka.

Taamatut oqaaseqarlunga Naalackersuisut sinnerlugit siunnersuut Inatsisartuni suliarineqartussanngortippara.